

PAS Hormat Keputusan Majlis Fatwa, Tegass Pendirian Bersih 3.0 Berniat Baik
mStar Online
Mei 07, 2012

KUALA LUMPUR: PAS bertegas Bersih 3.0 dibuat dengan niat dan matlamat yang baik walaupun Jawatankuasa Fatwa Majlis Kebangsaan, pada Ahad, memutuskan penglibatan individu dalam Bersih 3.0 sebagai haram.

Naib Presiden PAS Datuk Mahfuz Omar berkata, PAS bagaimanapun menghormati keputusan panel jawatankuasa yang dipengerusikan Profesor Emeritus Tan Sri Dr. Abdul Shukor itu.

Menurut Mahfuz sejak perhimpunan Bersih kali pertama sehinggalah Bersih 3.0, ketiganya mempunyai matlamat sama dan mengajak ke arah kebaikan iaitu menuntut pilihan raya yang bersih dan adil.

"Dari awal kita pergi dengan niat baik nak tuntutan pilihan raya bersih dan adil.

"Kalau kita niat tak baik kita bawa senjata tapi kita hanya berbekalkan garam dan air mineral sahaja," katanya pada satu sidang media dekat sini, Isnin.

Katanya, Bersih 3.0 perlu dinilai secara keseluruhan termasuklah tujuan dan faktor kesanggupan rakyat untuk keluar berhimpun beramai-ramai di ibu kota.

"Bagaimanapun kita hormati keputusan Majlis Fatwa, sebab itu hak mereka (buat keputusan)," katanya.

Dalam pada itu Mahfuz turut menafikan Bersih 3.0 berniat untuk menggulingkan kerajaan.

Katanya, perkara ini dapat dilihat menerusi tujuan dan matlamat perhimpunan diadakan.

Jelasnya, masih terdapat beberapa isu berkaitan pilihan raya masih diragui oleh rakyat dan boleh diperbaiki.

Justeru, beliau berharap agar kerajaan kembali fokus dan melihat persoalan pokok iaitu mengadakan pilihan raya yang adil dan bersih di negara ini.

"Kita bukan nak menang percuma, tapi cuma mahu melalui pilihan raya yang bersih dan adil. Saya minta kerajaan kembali melihat persoalan pokok perhimpunan diadakan," jelasnya.

Bersih 3.0 diputuskan sebagai haram selepas jawatankuasa memandang serius isu ini di mana sebahagian umat Islam telah bertindak sebagai perusuh jalanan dalam banyak perhimpunan atau demonstrasi termasuk seperti yang berlaku pada perhimpunan di ibu negara 28 April lepas.

Sehubungan itu, umat Islam yang menyertai demonstrasi itu perlu insaf kerana tindakan itu bukan daripada ajaran Islam kerana Islam tidak pernah menyuruh umatnya bertindak sedemikian sehingga mengancam nyawa sesama manusia demi mencapai sesuatu agenda.

Hakcipta Terpelihara © 1995-2012 Star Publications (Malaysia) Bhd

Source:

http://mstar.com.my/berita/cerita.asp?file=/2012/5/7/mstar_berita/20120507154243&sec=mstar_berita